

tantum deprecantis, sed pronuntiantis tanquam auctoritatem habentis : ergo.

2º *Auctoritate concil. Florent. et Trid.* quæ definierunt formam sacramenti Pœnitentiae sitam esse in his verbis, *Ego te absolvo a peccatis tuis*, et preces quæ illis laudabiliter adjungi solent, ad essentiam formæ non pertinere. Nonne eo ipso definierunt formam essentialē esse indicativam?

3º *Plures sancti Patres* comparant ministerium sacerdotum novæ Legis pœnitentes absolventium ministerio levitarum leprosos probantium, et inter hos et illos hoc admittunt discri men, scilicet, quod in nova Lege sacerdotes lepram peccati non tantum probent mundatam, sed mundent; dum levitæ lepram carnis solummodo declararent mundatam: atqui tale non admitteretur discri men, si forma simpliciter deprecatoria sufficeret.

4º *Ratione theologica.* Sacramentum Pœnitentiae per modum judicij fuit institutum: sacerdos igitur debet proferre sententiam ut judex: porro sententiam non proferret ut judex, si tantum deprecaretur: ergo.

Insuper probavimus supra absolutionem sacerdotis peccata esse remissa declarantis, nudum non esse ministerium, sed actum judiciale: ergo denique, etc.

Verum forma deprecatoria in sono, sed indicativa in sensu, valida est; constat enim propria verba formæ hujus sacramenti a Christo non fuisse determinata: sufficit ergo ut actio ministri absolventis exprimatur et verificentur verba Christi, *Quorum remiseritis*, etc. Porro actio ministri absolventis per formam deprecatoriam in sono et indicativam in sensu exprimitur. Supponatur, v. g., hæc forma Græcorum, apud *Goar*, *Domine Jesu Christe, Fili Dei vivi, pastor et agnus qui tollis peccata mundi... relaxa, remitte, condona peccata... a servis tuis istis commissa*. Cum sacerdos prius audierit penitentem eique satisfactionem injunxit tanquam judex, nonne sensus hujusmodi verborum est: *Remitte, Domine, peccata cui ea remitto, seu, in cuius gratiam ministerium meum exerceo, juxta verba tua Quorum remiseritis*, etc.? Ergo.

Unde 1º, licet forma deprecatoria olim adhibita fuerit apud Latinos, *hocque supposito, non concessso, nihilominus* sacramentum erat validum. 2º Etiam si sola forma deprecatoria in sono adhiberetur apud Græcos, validitas sacramenti non perilitaretur; et idcirco Latini talem formam eis nunquam exprobaverunt, nec dubitaverunt illos sacramentum Pœnitentiae retinere.

Cæterum, falsum est solam formam deprecatoriam in usu esse apud Græcos; *Goar* enim plures describit formas indicativas apud Calabros, Apulos et Siculos usurpari solitas, quas nonnulli Orientales acceptarunt. Arcudius, ipse Græcus, probat, in opere cui titulus: *Concordia Ecclesiæ Orientalis et Occidentalis in sacramentorum administratione*, l. 4, cap. 2, eas formas quæ primo aspectu deprecatoriae videntur vere esse absolutas quoad sensum, et initio capituli sapienter observat « nullam unquam fuisse » controversiam de hac re inter Græcos et Latinos, ac « proinde non esse verisimile antiquam formam hujus » sacramenti ex odio alicuius vel malitia mutatam ali- « quando fuisse, et incredibile dictu videri Græcorum » ecclesiam nunquam habuisse veram formam hujus » sacramenti. »

CAPUT SEPTIMUM.

DE MINISTRO SACRAMENTI POENITENTIAE.

Tres hujus capituli erunt articuli, quorum primus erit de charactere in ministro sacramenti Pœnitentiae requisito; secundus, de jurisdictione ipsi necessaria; et tertius, de ejus officiis seu obligationibus.

ARTICULUS PRIMUS.

DE CHARACTERE IN MINISTRO SACRAMENTI POENITENTIAE REQUISITO.

Valdenses existimabant bonum laicum, non vero ma-
lum sacerdotem, habere facultatem absolvendi. Inter ar-

ticulos *Wiceli* in concilio Constantiensi damnatos, iste reperitur, *laicum, si vir frugi fuerit, clavium potestatem a Christo accepisse*. Novatores in concilio Tridentino damnati docebant, referente *Palavicin.*, lib. 12, cap. 10, sa-» cerdotes non habere potestatem ligandi et solvendi, nisi » Spiritus sancti gratia et charitate sint praediti; et non » eos solos esse ministros absolutionis, sed omnibus et » singulis Christianis esse dictum: *Quodcumque solve-» rit, etc.* Soli tamen ministri apud ipsos sententiam reconciliationis pronuntiant.

P. Morinus arbitratur atque contendit, lib. 8, cap. 3, diaconis concessum fuisse apud Latinos confessiones audire et a peccatis absolvere in casu necessitatis, id est, in mortis periculo et deficiente sacerdote.

PROPOSITIO.

Solus sacerdos minister est sacramenti Pœnitentiae.

Prob. Illa propositio est de fide, constat Scriptura sacra et SS. Patribus.

1° *Est de fide*, ut pote definita a conc. Trid., sess. 14, can. 10, his verbis: « Si quis dixerit sacerdotes qui in » peccato mortali sunt, potestatem ligandi et solvendi » non habere; aut non solos sacerdotes esse ministros » absolutionis, sed omnibus Christi fidelibus esse dictum: » *Quodcumque ligaveritis... anathema sit.* » Idem jam tradiderant concilium Florentinum, in Decreto ad Armenos, conc. Const. adversus Wiclesum, et conc. Later. IV, præcipiendo ut omnes fideles semel in anno peccata sua proprio sacerdoti confiterentur. Hæc verba, *proprio sacerdoti*, supponunt confessionem soli sacerdoti fieri posse. Ergo 1°.

2° *Constat Scriptura sacra*. Hi soli habent potestatem remittendi peccata quibus Christus, instituendo sacramentum Pœnitentiae, dixit: *Quorum remiseritis.... Atqui Christus hæc verba, non ad laicos, sed ad solos Apostolos proindeque ad eorum successores direxit. Porro soli sacerdotes in eo Apostolis successerunt, et hanc potestatem*

obtinuerunt, ut constat ex unanimi traditione quæ sic verba Christi intellexit. Ergo 2°.

3° *Ex SS. Patribus*. Omnes enim sancti Patres quos pluries citavimus, vel expresse dixerunt, vel supposuerunt solos sacerdotes sacramenti Pœnitentiae esse ministros: v. g., *S. Cyprianus*, dum remissio facta per sacerdotes; *S. Ambrosius*, qui relaxandi licentiam sacerdotibus suis concessit; *S. Chrysostomus*, qui dignitatem sacerdotum, ex potestate remittendi peccata verborum Christi, elevat. Ergo 3°. Aliunde, etc. insuper.... Ergo.

De fide est ergo 1° sacerdotes etiam malos sacramenti Pœnitentiae esse ministros; 2° nunquam laicos, quantumvis bonos, et in quacumque necessitate, sacramentum istud administrare posse. Verum opinio P. Morini definitioni Conc. Trid. non directe adversatur, ac proinde anathemate non percutitur, licet manifeste sit falsa et hæresi proxima; cum traditione enim et cum his Conc. Trid. verbis, aut non solos sacerdotes esse ministros absolutionis, conciliari nequit.

Solvuntur objectiones.

Obj. Hæc verba, *Euntes.... baptizantes eos in nomine Patris.... ad solos Apostolos directa sunt: atqui non soli Apostolorum successores, sed laici ipsaque mulieres validè baptizare possunt: ergo a pari, etc.*

R. Nego conseq. et paritatem. 1° Quia ipsa Scriptura subiunxit exempla Baptismi a diacono, scilicet a Philippo collati, Act. Apost. VIII, 12 et 38; 2° quia Ecclesia semper credidit et docuit Baptismum a laicis et etiam a mulieribus collatum, esse validum; nihil vero tale proferatur ubi de Pœnitentia agitur: insuper conveniens erat ut Baptismus ad salutem necessarius necessitate medii, non a solis sacerdotibus administrari posset; non ita necessaria est Pœnitentia. Ergo.

Inst. S. Jacob., v, 16: *Confitemini alterutrum peccata vestra et orate pro invicem ut salvemini: ergo ipsi laici confessionem excipere possunt.*

R. Dist. conseq. Si haec verba de confessione non sacra-

mentalii intelligentur, *cōc.*; si de confessione sacramentali intelligenda sint, *nēgo cōseq.* Etenim quidam dicunt B. Jacobum per verba *confitemini alterutrum peccata vestra*, solam intelligere confessionem quae fit humilitatis causa, vel ad petenda consilia: tunc certum est ipsos laicos hujusmodi confessionem aliquando excipere posse. Si vero, ut alii volunt, de confessione sacramentali ibi Apostolus loquatur, per verbum *alterutrum*, non quilibet intelligendi sunt homines, sed soli sacerdotes, siquidem invictis argumentis constat solos sacerdotes hujus sacramenti esse ministros. Ergo.

Obj. 2^o. S. Cyprianus dicit, Ep. 12, loquens de homine in periculo mortis constituto: « Si presbyter repertus non fuerit, et urgere exitus cōperit, apud diaconum quoque exomologesim facere delicti sui possunt, ut manu ejus in Pœnitentiam imposta, veniant ad Domum cum pace. » Ergo saltem et diaconi sunt ministri hujus sacramenti ad sensum P. Morini.

R. Nēgo cōseq. Nam, juxta doctorum interpretationem quae perpetua traditione innititur, de sacramentali reconciliatione ibi non agitur, sed de absolutione ab excommunicatione in lapsos pronuntiata, vel probabilius a pœnitentiis canonice quibus lapsi subiciebantur: atqui non repugnat diaconos olim fuisse deputatos ad tollendas hujusmodi pœnas ecclesiasticas, præsertim in casu necessitatis, ut exprimit S. Cyprianus. Si autem Ecclesia per suasum habuisset eos in casu necessitatis a peccatis sacramentaliter absolvere posse, cur ministerium istud decursu temporum ipsis non credisset et etiam nunc non crederet, sed potius crudeliter sineret peccatores, deficiente sacerdote, in præsentia diaconi sine reconciliationis sacramento decidere? Nonne talis consuetudo demonstrat non magis diaconos quam laicos sacramenti Pœnitentiae esse ministros? Ergo.

Inferendum est, ex dictis in præsenti articulo, absolutiones a confessario non valide ordinato, sive sit impostor, sive bona fide se credit sacerdotem, prorsus esse nullas: sola igitur contritione perfecta peccator in eo casu justificari potest.

ARTICULUS SECUNDUS.

DE JURISDICTIONE MINISTRO SACRAMENTI PŒNITENTIAE NECESSARIA.

Jurisdictio in genere est potestas regendi subditos, ut explicatur in Tractatu de Ordine. Potest esse civilis vel ecclesiastica, pro foro externo vel pro foro interno. Hic agitur de sola jurisdictione pro foro interno, non secundum totam suam extensionem, sed tautum in ordine ad absolutionem sacramentalem.

Definitur potestas quam habet sacerdos alterum in sacramento Pœnitentiae absolvendi et obligandi tanquam subditum.

Duplex distinguitur, ordinaria scilicet et delegata. Ordinaria ea est quam quis habet ratione sui officii, cui jure communi annexa est cura animarum. Talis est jurisdictione quam habent, ratione suorum officiorum, Papa, episcopus, parochus.

Jurisdictio delegata illa dicitur quam habet sacerdos ex alterius commissione, ut, apud nos, vicarii, presbyteri habituati, missionarii, eleemosynarii hospitiorum, capellani monasteriorum, etc.

Hic septem nobis inquirenda sunt, videlicet 1^o an jurisdictio sit necessaria ad validitatem absolutionis; 2^o quinam habeant jurisdictionem ordinariam; 3^o quinam habeant delegatam; 4^o an qui ex errore communi pro ordinariis vel delegatis habentur, valide absolvere possint; 5^o quid sit approbatio et an necessaria; 6^o quinam a peccatis reservatis absolvere possint: 7^o quinam habeant jurisdictionem in articulo mortis.

§ I. — An jurisdictio sit necessaria ad sacramentum Pœnitentiae valide administrandum.

PROPOSITIO.

Præter ordinis potestatem, necessaria est jurisdictio in sacerdote ut valide absolvat.

Prob. 1^o auctoritate conciliorum, Conc. Lat. IV, can. 21, hæc habet: « Si quis autem alieno sacerdoti voluerit justa